



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FA-V12, FE-223	23/1041

HANDSAMING AV SØKNAD OM TILSKOT TIL INNKJØP AV NOFENCE FOR BRUK PÅ GEITER SOM LANDSKAPSPLEIARAR

Vedlagte saksdokument:

Søknad om bygdeutviklingsmidlar - Støtte til opning av landskap

Kommunedirektøren sitt framlegg til vedtak:

Bygdeutviklingsutvalet løyver inntil kr. 7 000,- i bygdeutviklingsmidlar til Tor-Arne Helle til innkjøp og bruk av Nofence på geiter som landskapspleiarar langs turvegen frå Hellestræ til Storafjellet.

Tilskotet vert løyvd som eit «fast» eingongsbeløp, som utgjer 47 % av budsjettert kostnad.

Det er eit vilkår at aktuelle grunneigarar har gjeve løyve til planlagt beitebruk.

Tilskotet vert betalt ut etter innsending av sluttrapport, med betalingsoppmoding og kostnadsdokumentasjon (faktura, bilete m.m.)

Løyvinga gjeld i to år, fram til og med 01.10.2025.

Saksopplysningar:

Samandrag/konklusjon (kort om saka)

I søknad av 07.08.23 søker Tor-Arne Helle om kr. 14 900,- i bygdeutviklingsmidlar til innkjøp av utstyr for bruk av Nofence på geiter. Søknaden utgjer 100 % av kostnadsoverslaget.

Utstyret skal nyttast på geiter som skal beite langs turløypa frå Hellestræ til Storafjellet, gjennom bruk av «elektronisk gjerde». Målet å opne landskapet og å fremje ferdsle, trivnad og opplevingar.

Bygdeutviklingsmidlane skal leggje til rette for aktivitetar og opplevinga for ålmenta. Kommunedirektøren er i dette høvet usikker på om tiltaket i tilstrekkeleg grad, fell inn under føremålet til midlane. Det vert likevel vektlagt at bruk av geiter som landskapspleiarar, vil fremje landskapskvalitetane og kulturlandskapet langs ein mykje nytta turveg, som igjen gjev grunnlag for tilskot.

Innstillinga er å løyve kr. 7 000,- til tiltaket, som utgjer 47 % finansiering av budsjettert kostnad.

Bakgrunn for saka

Bygdeutviklingsutvalet har lyst ut ny søknadsrunde for Bygdeutviklingsmidlane, med kr. 265 000,- til rådvelde. Det kom inn 11 søknadar, med ein samla søknadssum på om lag kr. 760 000,-.

Målet med tilskotsordninga er å skape opplevingar og aktivitetar som er opne og tilgjengeleg for alle, og som fremjar trivnad lokalt. I dette høvet kan lag, organisasjonar, verksemder og einskildpersonar søkje om tilskot til prosjekt eller gjeremål med ålmennyttig verdi.

I sin søknad av 28.08.23, søker Tor Arne Helle om kr. 14 900,- til å bruke geiter som landskapspleiarar. Dette skal gjerast ved innkjøp og bruk av Nofence (6 stk. klavar og beacom), gjennom styrd arealbruk («elektronisk gjerde»).

Søknaden er motivert av at søkjar ønskjer å skaffe seg fleire geiter enn dei tre han har i dag, for å skape meir beitetrykk i terrenget. Bruk av Nofence gjev i dette høve effektiv nytting av beiteområdet, med oversikt over bruken av beitet til kvar tid. Det vert også lagt opp til informasjon om dette til publikum.

Søkjar meiner at tiltaket vil fremje landskapsoppleving og turglede, og at bruken av geiter som landskapspleiarar, vil kome mange turgåarar til nytte.

Det vert søkt om 100%-finansiering ut frå følgjande budsjett:

UTSTYR	KOSTNAD, INKL. MVA.
Klavar (6 stk.)	14 625,-
Beacon (sparer straum)	275,-
SUM	14 900,-

Eigeninnsatsen er knytt til tilrettelegging og tilsyn .

Nærare informasjon om tiltaket går fram av vedlagt søknad.

Formelt grunnlag:

- «Retningslinjer for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden vert vurdert som tilstrekkeleg opplyst for sakshandsaming og vedtak etter gjeldande krav.

I følge bygdeutviklingsmidlane sin retningslinjer, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv. Her inngår mellom anna stønad til konkrete prosjekt, tiltak og aktivitetar

Det kan knytast tvil til om gjeldande tiltak er i tråd med bygdeutviklingsmidlane sitt føremål og retningslinjene som skal liggje til grunn for tildeling.

Tiltaket skil seg frå dei fleste andre tiltaka det vert søkt om stønad til, ved at det handlar om beitedyr, som første og fremst er knytt til jordbruket, med aktuelle tilskotsordningar, som SMIL og midlar til organisert beitebruk. Søkjar kjem truleg ikkje innanfor desse verkemidlane, grunna driftsomfang og tilknytning. I dette høvet kan det derimot nemnast at bruk av geiter med Nofence, i stadig større grad vert nytta til landskapspleie, i tillegg til tradisjonell beiterydding og jordbruksdrift. Dette ved at fleire og fleire gjer bruk av beitedyr for å opne opp landskapet i utmark, med mål om å fremje landskapsopplevinga til glede for turgåarar.

I gjeldande søknad vert det lagt vekt på verknaden og verdien av beitebruk og landskapsrydding for turopplevinga langs ein populær turveg, der landskapet i standen for tradisjonell hogst og rydding, vert opna opp ved bruk av geiter. Dette er truleg eit like effektivt, varig og rasjonelt tiltak, der bruk av dyr også gjev ein meirverdi i høve til trivnad og oppleving.

Søknaden representerer eit lite beløp, og med bakgrunn i grunngjevinga ovanfor og tilgjengelege tilskotsmidlar, gjer Kommunedirektøren framlegg om å løyve kr. 7 000,- til gjeldande tiltaket. Dette utgjer 47 % av budsjettet og godkjend kostnad.